

■ PUNTG DA VISTA

# Sche Economiesuisse fa il botsch, fa la politica piruettas

DA CLAUDIA CADRUVI / ANR

Mo trais vuschs avessan man-  
cà e la chombra pitschna na  
fiss ier betg entrada sin la revisiun  
dal dretg d'acziar. La stad passada,  
suentar ch'il cussegl naziunal aveva  
gì tractà la fatschenta, aveva Eco-  
nomiesuisse anc ludà lung e lad la  
refurma: Ella saja indispensabla  
per levgiar la fundaziun da start-  
ups, ella faciliteschia l'augment da  
chapital, ella resguardia la digitali-  
saziun ed ella deblocheschia in-  
summa il stop da refurma.

Il november ha la cumissiun da  
la chombra pitschna benedì  
quasi unanimamain la fatschenta e  
tuttenua hai midà chanzun. Ord  
ils ravugls dad Economiesuisse hai  
tuttenua gè num che la refurma  
saja surchargiada, ella cuntegna  
passa tschient pegiuraments ed in-  
summa il vegl dretg d'acziar saja sa  
cumprovà, i dovria gnanca mida-  
das. Cussegliaer dals chantuns *Rue-  
di Noser* (pld/ZH) ha purtà que-  
stas rinfatschas pauschalas en il

parlament ed ha tschentà la du-  
monda da betg entrar en materia.  
Sche la chombra pitschna fiss  
suandada avess quai periclità l'en-  
tira refurma.

Success ha dentant gè la propo-  
sta dad *Andrea Caroni* (pld/  
AR) da renviar la fatschenta a la  
cumissiun che duaja sa fatschentar  
anc ina giada da rudent da la  
chaussa e formular ils giavischs da  
l'economia sco propostas da mino-  
ritad. Ma tge èn propi ils giavischs  
da l'economia? Las associaziuns  
d'economia e da mastergnants èn  
gea stadas consultadas pliras giadas  
e suenter la fasa da consultaziun  
han ins aposta adattà la refurma  
tenor lur propostas.

Il parlamentaris ch'han pledà ier  
en num dad Economiesuisse  
n'han betg propi vulì ora cun il  
marmugn tge che fiss da midar  
materialmain per spendrar la re-  
furma. Tgi sa, èsi forsa las recu-  
mandaziuns per dapli dunnas che  
vilentan Economiesuisse? Promo-



ver dapli dunnas en las etaschas  
autas da grondas interpresas quo-  
tadas a la bursa è numnadamain  
ina da las finamiras da la refurma.

Cuntanscher questa finamira  
vul ins senza fixar reglas lian-  
tas u chastis en il dretg d'acziar.  
Prevedida è simplamain ina recu-  
mandaziun d'almain 30 per-  
tschient da mintga schlattaina en il

cussegl d'administraziun ed al-  
main 20 pertschient en la direc-  
ziun. In'interpresa che na cuntan-  
scha betg questas procentualas sto  
expligtar las raschuns persuentar  
en ses rapport annual e sto formu-  
lar mesiras da meglierament. Las  
interpresas vegnan pia intimadas,  
ma betg obligadas, da promover  
las dunnas.

Jau smirvegliass propi sche vus  
Jaschassas ir da la glatscha giu  
questa fatschenta mo pervi da  
quai», ha ditg ier cussegliera fede-  
rala *Simonetta Sommaruga*. Da  
propi attatgar la recumandaziun  
per dapli dunnas n'han ils porta-  
vuschs dad Economiesuisse betg gè  
il curaschi. Ed era nagin che fiss  
s'exprimì avertamain encunter las  
reglas da trasparenza per inter-  
presas che handlegian cun mate-  
rias primas. Ma i po tgunsch esser  
che gist quests dus puncts èn ils  
dus plugls che mordan.

Ad in'associaziun che repre-  
schenta interpresas privatas

statti sa chapescha liber da far il  
botsch. Forsa è gliez schizunt in  
bun med per cuntanscher meglier  
ils interess dals commembers d'ina  
tala associaziun. Nunchapaivel è  
dentant sche la politica fa piruet-  
tas, renviescha fatschentas a la cu-  
missiun e fa bunamain cupitgar  
ina refurma impurtanta mo per-  
quai che Economiesuisse mida tut  
tenor luna ses avis.

Il parlamentaris da la chombra  
pitschna n'han betg da politisar  
sco portavusch dad in'associaziun  
che represchenta interpresas gron-  
das e pussantas. Il parlamentaris  
han da far politica e da refurmar il  
dretg d'acziar sin ina moda ch'i  
serva a l'entir pajais. Tge ch'els  
emblidan memia savens: Betg las  
interpresas grondas èn il coc da  
l'economia svizra, mabain las ble-  
ras interpresas pitschnas e mesau-  
nas. Ellas dovran in dretg d'acziar  
contemporan e modern per ch'el-  
las sajan semtgadas per l'avegnir e  
cumpetitivas sin champ interna-  
ziunal.